



## SAOPĆENJE ZA JAVNOST

# Izazivanje opasnosti požarima i eksplozijom Nikoli Kokanoviću dvije godine i dva mjeseca zatvora

Brčko, 27.12.2022. godine

Pred Osnovnim sudom u Brčkom, Tužilaštvo Brčko distrikta BiH dokazalo je optužbe protiv Nikole Kokanovića (20)\* za podstrekavanje drugih osoba na izazivanje opće opasnosti podmetanjem požara i eksplozije u tom gradu prošle godine. Za podstrekavanje na izazivanje opće opasnosti paljevinom automobila skupštinskog zastupnika i bacanjem bombe na ugostiteljski objekt, kao i za nedozvoljeno držanje oružja, on je danas nepravosnažno osuđen na jedinstvenu kaznu zatvora od dvije godine i dva mjeseca.

Kokanović je optužen da je najprije podstrekao Nedeljka Trifkovića da, za novac, podmetne požar na automobilu zastupnika u Skupštini Distrikta Uroša Vojnovića. Kako se navodi u optužnici on je Trifković, pošto je pristao, odvezao do kuće oštećenog pokazavši mu vozilo koje će zapaliti. Trifković je zatim 29. maja oko 02.00 sata, držeći u ruci plastičnu flašu napunjenu benzinom prišao vozilu koje je bilo parkirano na trotoaru ispred dvorišta porodične kuće Vojnovića, a zatim posipanjem te zapaljive tečnosti i otvorenim plamenom izazvao požar koji je potpuno uništio Vojnovićev automobil. Usto, Kokanović je optužen i za podstrekavanje na izazivanje opće opasnosti izazivanjem požara na automobilu Milenka Perendije, koji je putem maloljetnog N.M.\* podmetnut 15. jula, ali i bacanjem eksplozivne naprave na ugostiteljski objekat *Dos Manos*, u naselju Kolobara, 17. avgusta prošle godine. Deset dana kasnije, Kokanović je uhapšen i odmah pritvoren, a po okončanju proširene istrage, on je pred Osnovnim sudom optužen za krivično djelo Izazivanje opće opasnosti (iz člana 317 stav (1) Krivičnog zakona Brčko distrikta BiH), u podstrekavanju. Njemu je istom optužnicom stavljeno na teret i krivično djelo Nedozvoljeno držanje oružja ili eksplozivnih materija (iz člana 365 stav 1. Krivičnog zakona), jer je neovlašteno nabavio i držao ručnu bombu M 52, koju je N. M. po njegovim uputama aktivirao i bacio na *Dos Manos*.

Tokom suđenja pred Osnovnim sudom Brčko distrikta, Kokanoviću su dokazane optužbe za podstrekavanje na izazivanje opće opasnosti paljevinom automobila Vojnovića i bacanjem bombe na *Dos Manos*, kao i optužbe koje se odnose na nedozvoljeno držanje eksplozivnih materija. Stoga je za ova krivična djela nepravosnažno osuđen na jedinstvenu kaznu zatvora od dvije godine i dva mjeseca. S druge strane, Kokanović je oslobođen od optužbe za podstrekavanje na izazivanje opće opasnosti podmetanjem požara na automobilu Milenka Perendije. Kao i Tužilaštvo distrikta Brčko, on presudu može pobijati žalbom, nakon dostavljanja njenog pisanog otpravka.

\*Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

GLAVNI TUŽILAC  
ZEKERIJA MUJKANović